

Erich Bolinius
www.erichbolinius.de

(Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 13.2.2014 18.00 Uhr auf 94.0 bzw. 87,7)

Moin, leev Toehörers,
ennelk kann ik weer van twee Spölen van Kickers Emden vertellen. Wall immer noch neet van Punktspölen, man van Fründskuppsspölen. De eerst drog de Mannskupp up de Kunstrasen in Esens ut. Dor verlor Kickers Emden mit 0:1. In Esens is dat neet so eenfach, up de Kunstrasen toe spölen. Hebb ik vör eenige Tied sülvst faststellt, as ik mi mien Ü60-Mannskupp van SV Petkum dor up spölt hebb. Ok wi hebben verloren, lagg aber neet alleen an de Platz.

Kickers Trainer **Markus Olbrys** was na dat Spöl in Esens gaar neet untoefree. Dat hett he toeminnst tegen de Bladdjeschrievers seggt. Muss he seker ok so seggen, na sien eerst Spöl as Cheftrainer van Kickers Emden.

Dat tweed Fründskuppsspöl tegen de Süderneulander SV leep aber heel un dall anners, ja beter. Dat Spöl wurr van Kickers Emden mit 5:0 wunnen. So truff **Tido Steffens** tegen de Bezirksligist glik veer Maal in 't Nett van de Gastgeber. Nadem he mit sien eerst groot Kans de SSV-Torwart **Sascha Fischer** neet overwinnen kunn, truff he al na seß Menüten toe dat 1:0. Kickers was klaar overlegen un Steffens kunn in de 12. un 38. Menüt noch twee Toren sketen. Dortüskan harr **Gökay Batbay** 'n Foulelfmeter in de 22. Menüte in 't Tor unnerbrocht. So stunn dat al in de Halvtied 4:0 för Kickers Emden. Kickers was ok in de tweed Halvtied overlegen. In de 55. Menüte skoot dann Tido Steffens dat fiefte Tor för Kickers Emden. As dann ok noch **Michael Murra** van Süderneuland in de 60. Menüte wegen Foulspöl van Platz stellt wurr, dochen de Toekiekers, dat dat Spöl tweestellig utlopen würr. Man dorvan wurr nix. Kickers leet toevöl Kansen ut. Un so meente ok Trainer Olbrys na dat Spöl, dat man hoger harr winnen musst.

Vannabend spölt Kickers Emden nu in Ihrhove un Sönndag in Thüle tegen des SV Hansa Friesoythe. Hopen wi maal, dat de Testspölen goed för Kickers utlopen, dormit man mit breed Borst dann an de komende Wekenenn in dat eerst Punktspöl in Oldenbörg gahn kann.

De A-Jögdmannskupp van Kickers Emden hett in disse Saison ja noch neet völ reten un steiht mit blot 4 Punkten an de vörlesd Stee in de Regionalliga Noord. De Jungs unner Trainer **Tammo Pfeiffer** geven wall all Spöl för Spöl hör Bestes. Man de Klasse fehlt doch bi eenigen för de Spölen in de Regionalliga. Nu hebb ik hört, dat glik veer Spölers de A-Junioren van Kickers Emden verlaten un sük de TuS Strudden ansloten hebben. Dat word för Trainer Tammo Pfeiffer 'n heel Stück schwaar Arbeit, de Jungs för de lesd twalv Spölen, de noch anstahn, toe motiveren. Man 'n freewillige Toerüggtrecken ut de Regionalliga dürt neet in Fraag komen, muss doch dann de Mannskupp weer heel unnern in de Jögdiligen anfangen. Dat mutt vermeden worden. Dor is ok de Vörstand fordert!

So, toe Schluss, nettso as alltied, 'n kört Foetballwitz:

Weffe Sportoord spölten egentlik de Verteidigers van Werder Bremen lesd Saterdag tegen Borussia Dortmund, dat 1:5 utgung? Mikado – Well sük as eerster beweggt, hett verloren.

So, leev Toehörers van Radio Oostfreesland,
ik hoop, Joe hett dat Plattdüütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.
Bit anner Maal
Joe

Erich Bolinius ut Emden-Petjem.

.